

Necrolog per Franzisca Venzin-Monn

Gia ein 5 meins vargai dapi che la Franzisca Venzin-Monn ei spartida da quest mund. Malgrad la malsogna sur liung temps, ha ella bandunau ils ses empau surpriendent.



La Franzisca ei naschida ils 8 da mars 1932. Ses geniturs fuvan il Rest Valentin Monn e la Margretha Monn-Caduff. Carschida si eis ella a Sedrun en Tgèsa Gronda ensemen cun treis soras e dus frars.

Gia en ses giuvens onns ha era ella stuiu sentir las varts umbrivaunas dalla veta. Nunspitgadamein ed ella vegliadetgna da strusch otg onns miera siu frar, il Placi. Mo priu en tut ha la Franzisca astgau guder ina biala affonza era sch'ei ha giu num da tschappar en e segidar el sempel

menaschi puril. Bials e leghers muments ha ella era astgau passentar ensemen cun ils 50 affons dil quartier dalla Tgèsa Gronda.

Terminai ils onns da scola a Sedrun ha la Franzisca stuiu far enconuschientscha cuagl jester, bandunar la Val, encurir fadigia per sustener ils da casa. Saver viver da lezzas uras mo dil puresser en nossas vals era buca sempel. Aschia ha la giuvna luvrau ella bassa tier la fabrica da calzers Bally a Schönenwerd. Da quels temps ella bassa raquintava ella adina puspei plein entusiassem. Igl onn 1955 marida la Franzisca il Duri Battesta Venzin da Rueras. Ella seigi stada la davosa spusa da Tujetsch en vestgiu da nozzas ner. A Rueras sper baselgia cumpran els ina casa nua che la famiglia (2 buobas e 2 buobs) secasa. Vess ha la Franzisca fatg cura che siu bab, il Rest Valentin ei morts igl onn 1963. Ella haveva adina giu ina buna relaziun cun el.

Pil beinstar dils ses ha la Franzisca desistiu sin bia. Ella era ina dunna premurada ed haveva quitau per ils ses. Las entradas dil puresser fuvan mudestas, aschia ch'ins era vis-a-vis

sin gudogn accessori. Il Duri Battista ha menau sur plirs onns il cudisch per tratga da biestga e la Franzisca ei stada engaschada cun lavurs da pedel en casa da scola a Rueras. Culs onns ha la greva lavur sil funs spossau siu tgierp. Il dies e las giugadiras dulavan eifer igl affar da mintgadi e la Franzisca ha stuiu serestrenscher empau. Sche las forzas lubevan gidava ella adina puspei il fegl Hubert che haveva surpriu il fatg puril. Ils nov biadis purtavan legria en casa e la tatta haveva ina grondiusa relaziun tier els.

Ils davos onns ha la Franzisca puspei priu peda per siu grond hobi. Cun plascher e cun passiuun sentupava ella savens cun sias collegas per dar in scart troccas. Quels muments saveva ella emblidar empau ils mals. Denton la malsogna maligna ha spossau ella fetg, aschia ch'ella haveva strusch pli la forza da star en pei. Aschia ha ella stuiu serender el spital, nua ch'ella ei morta ils 9 da november 2010 buca nunspitgau, denton sorprendent.

Ella ruaussi en pasch.